

閩

詩

錄

閩詩錄丙集卷十六

侯官鄭杰原輯

侯官陳衍補訂

鄭思肖

思肖字憶翁號所南連江人太學上舍應博
學宏詞科元兵南下叩闕上太后幼主疏辭
切直忤當路不報遂客吳下寄食城南報國
寺以終有錦錢集一百二十四圖詩集成淳
集中興集

輟耕錄云先生剛介有立志會天兵南叩闕
上疏犯新禁眾爭目之由是遂變今名曰肖

日南義不忘趙北面他姓也隱居吳下一室
蕭然坐必南向歲時伏臘望南野哭而再拜
乃返人莫識焉工畫墨蘭不妄與人邑宰求
之不得聞先生有田三十畝因脅以賦役取
先生怒曰頭可斫蘭不可得過齊子芳之書
塾云此世但除君父外不會別受一人恩寒
菊云禦寒不藉水爲命去國自同金鑊心其
忠肝義膽于此可見
遺民錄云所南初名某宋亡乃改名思肖卽
思趙憶翁與所南皆寓意也坐卧不北向扁
其堂曰本穴世界以本之十置下文則大宋
也精墨蘭自更祚後爲蘭不畫土根無所憑
藉或問其故則云地爲人奪去汝猶不知耶

伯牙絕弦圖

終不求人更賞音只當仰面看山林一雙閑手無聊
賴滿地斜陽是此心

逢陳宜之

行李苦役役相逢古潤州
千金一夜醉四海十年游
山靜鬼行月宵涼人夢秋
近聞邊事急呖畝得無憂
送友人歸

年高雪滿簪喚渡浙江潯
花落一杯酒月明千里心
鳳凰身宇宙麋鹿性山林
別後空回首冥冥煙樹深
訪隱者

石竇雲封隱者家
一溪流水繞門斜
滿山落葉無行路
樹上寒猿刺蘼花

春日登城

城頭啼鳥隔花鳴
城外游人傍水行
遙認孤帆何處去
柳塘煙重不分明

春詞

春氣喧妍御夾紗
玉釵雙裊綠雲斜
倚欄看徧庭前樹
盡是枝頭結子花

春日遊承天寺

野梅香輭雨新晴
來此閑聽笑語聲
不管少年人老去

春風巖巖闔闔城

以上咸
漕集

隱居謠

布衣暖菜羹香
詩書滋味長

醉鄉

江湖初上玉船空
假道青州一水通
相去塵寰千萬里
不愁日夜不春風

以上中興集

自題墨竹

萬頃琅玕壓碧雲
清風幽興渺無垠
當時首肯說不得
不意相知有此君

鐵網珊瑚

謝翱補

翱字臯羽長溪人
後徙浦城咸淳中
試進士不第丞相
文信國開府延平
署諮議參軍有

晞髮集

鄧牧心謝臯羽傳畧云臯父性耿介不以貧累人所居產薪若炭率秋暮載至杭易米卒歲少裕則資遊江海訪前代故實著宋史補唐詩人無傳者三十餘篇傳近世隱逸數篇歲甲午與杭人鄧牧相遇會稽結爲方外友牧因爲言杭大會文士輩出余知若干人盡往見之旬日別去逮牧歸杭君已挈家錢唐江土問所從遊皆前所聞者其信好學也乙未秋牧薄游山水閒君病篤望牧不至懷以詩日謝豹花開桑葉齊戴勝芊生草藥肥九鎖山人歸未歸蓋絕筆于此任松鄉謝處士傳畧云臯羽常布衣杖策參人軍事晚登子陵西臺以竹如意擊石歌招魂之詞曰魂來兮何極魂去兮江水黑化爲朱鳥兮其味焉食歌闋竹石俱碎失聲哭何其情之悲也方韶卿謝臯羽行狀云君遺稿在時舊所爲悉棄去今在者手鈔詩六卷雜文五卷唐詩傳一卷南史贊一卷楚辭等芳草圖譜一卷宋饒歌鼓吹曲騎吹曲各一卷睦州山水人

物古蹟記一卷浦陽先民傳一卷東坡夜雨
句圖一卷浙東西游錄九卷春秋左氏續辨
歷代詩譜未脫稿選唐韋柳諸家及東都五
體在集外
宋詩鈔小傳云翔慕屈平托遠遊乃號晞髮
子天祥卒亡匿所至輒感哭挾酒登浙江子
陵釣臺設天祥主亭隅再拜號哭詳西臺慟
哭記欲爲文冢瘞之臺南後往來杭陸間與
方韶卿鳳吳子善思齊等厚乙未以肺疾死
燭妻劉以文與骨授之方有許劍錄其會友
之所名汐社取晚而信也每執筆遐思身與
天地俱忘語人日用志不分鬼神將避之古
詩韻頑昌谷近體則卓鑠沈著非長吉所及
也

花卿冢行

山谷云花卿冢在丹陵之東館鎮至今猶有英氣
血食其鄉

言金日集卷十六
四
濕雲模糊埋秋空雨青沙白丹陵東莓苔陰陰草茸茸
茸上聲云是花卿古來冢花卿舊事人所知花卿古冢
知者誰精靈未歸白日西廟鴉啄肉枝上啼絛州柘
黃魂正飛

效孟郊體

閒庭生柏影荇藻交行路忽忽如有人起視不見處
牽牛秋正中海白夜疑曙野風吹空巢波濤在孤樹
落葉昔日雨地上僅可數今雨落葉處可數還在樹
不愁繞樹飛愁有空枝垂天涯風雨心雜佩光陸離
感此畢宇宙涕零無所之寒花飄夕暉美人啼秋衣

不染根與髮良藥空爾爲

閨中玻璃盆貯水看落月看月復看日日月從此出
愛此日與月傾寫入妾懷疑此一掬水中涵濟與淮
淚落水中影見妾頭上釵

憶梁禮部椅

閒庭芳桂叢相憶曙雲空文字能娛老莓苔此興同
青山明月下家口少微東歲晚西莊路柴門語自工
拜立英先生畫像

來此得公真塵埃避隱淪水生溪榜夕苔卧野衣春
兩冢侵吳甸荒祠侑漢人微陰值衰世爲爾獨傷神

呈王尙書應麟

寒風吹髣髴影客淚濕衣塵千里見積水滿城無故人
舩歌甌雪盡劍舞越花新獨憶絲綸老相從話所親
山陰道中呈鄭正樸翁

楊柳遠天色野風來水涯異鄉同夢客今雨故人家
越樹夜啼鳥禹陵冬落花悠悠江海意爲爾髣先華
送毛耳翁之湘南

湘草碧於水王孫尙此留一身行萬里雙髣集諸愁
月落嶽雲曙龍逃海雨秋可能無事業相見竟悠悠
哭廣信謝公

自爾逃名姓終喪哭水濱海僧疑見貌山鬼舊爲隣
客死留衣物囊空出告身他年越鄉值賣卜有斯人

雨夜呈韶卿

相看隴水雲一夕幾回分預恐今宵雨他年獨自聞
野花同楚越江靄雜朝暉不得鋤芝朮逢樵卻寄君

西臺哭所思

殘年哭知己白日下荒臺淚落吳江水隨潮到海迴
故衣猶染碧后土不憐才未老山中客唯應賦八哀

哭肯齋李先生

落日夢江海呼天野水涯百年唯此死孤劍託全家

血染楚花碧魂歸蜀日斜能令感恩者狼籍對荒遐
遊釣臺

百臺臨釣渚遺像在蒼煙有客隨槎到無僧依樹禪
風塵侵祭器樵獵避兵船應有前朝蹟看碑數漢年
韶卿住烏傷寄劉元益

他日憶逢君林中訪惠勤鹿麕行處見流水別時聞
草沒秦人冢山通越國雲音書年歲失莫訝白鷗羣
小元祐歌寄劉君鼎

前甲子小元祐句章稷黑權臣死端平天子初改紀
龔芳泰陵種蘭芷當秋淮甸枯草黃彎弧北向射天

狠狐南星光天狗墮入蔡生擒完顏王是年南海無
波浪月濕珠胎君以降只今六十空白頭獨騎麒麟
補春秋天回星周美惡復人世更傳芝州錄
以上晞髮集

過杭州故宮二首

以下晞髮近稿

禾黍何人爲守閨落花臺殿暗銷魂朝元閣下歸來
燕不見前頭鸚鵡言

紫雲樓閣譙流霞今日淒涼佛子家殘照下山花霧
散萬年枝上挂袈裟

重過二首

複道垂楊草欲交武林無樹著凌霄野猿引子移來

往覆盡花枝翡翠巢

隔江風雨動諸陵無主園池草自春聞說就中誰最
泣女冠猶有舊宮人

散髮

乾坤一楚囚散髮向滄洲詩病多於馬身閒不似鷗
因看東去水都是夜來愁晚意落花覺殘枝香更幽
友人自杭回建寄別三首

同來不同去離別暗銷魂閩浙若同水扁舟送到門
潮信到嚴灘水色過衢城寄潮不寄水潮去有回程
水到衢城盡梅花上嶺生不如寄明月步步送君行

吳山謁祠

吳山坊頂戴高祠禁地淒涼江水悲卻
是北人題記
壁迤南耆舊獨無詩

梅花

春過江南問故家孤根生夢半槎牙
到無香氣飄成雪未有葉來開盡花

吹老單于月一痕江南知是幾黃昏
水仙冷落瓊花死祇有南枝尙返魂

書文山卷後

魂飛萬里程天地隔幽明死不從公
死生如無此生

丹心渾未化碧血已先成無處堪揮淚吾今變姓名
贈山中友

散策辭山雲值此山林友種松高及身掃葉落隨手
斫盡松上枝縛作山中帚夜夜對西風明月生戶牖
沙岸登舟

五里兒女步虛沙映斷筇雲支半山石帆席上溪風
數雁憐身隻聞鵲願耳聾市橋東畔塔側影夕陽中
社前

無家借燕住離別又經年客館依山上春分到社前
雨來換宿水雲起暗晴川颯颯吹衣帶因風問去船

詹本補

本字道生建安人丞相江萬里薦爲郎先致
書本本方坐門前石上釣使者至問本居本
日前卽持竿渡溪去不知所終

春日攜客遊武夷

山腳健枝梧百里插蒼峭粼粼石可把曙色坐遠釣
風水眞笙竽歷落太古調衣冠帶莽蒼山鬼驚二妙
雲月正忘年花鳥更索笑迴船翠淩亂吾道付長嘯

閑中

萬事問不知山中一樽酒埽石坐松風綠陰滿巾袖

宿天台

風泉隔西屋獨夜寒自生開窗失山色白雲壓前楹
累盡得瀟灑去住俱不驚鼻息答僧鐘霜露入殘更
以上
谷音

詹琰夫

補

琰夫字美中崇安人南宋隱士

止止庵卽事

小結茅庵倚薜蘿主人心事定如何春風枕上邯鄲
夢夜雨燈前雲水歌歲月不堪頻把玩山林偏稱小
婆娑年來欲問長生訣止止庵中養太和

武夷山志

林同補

同字子真號空齋處士福清人以世澤授官
棄不仕元兵至福州監丞劉仝子糾義兵卽
其家置忠義局敵至同死之有孝詩一卷

劉後村跋云子真性純孝父寒齋病左右侍
湯藥至不忍入州應舉嘗赴胄試自里抵家
得詩一卷十之九皆思親之言年未四十慨
然罷舉志尤潔非躬耕不食植梅百株日哦
其下

魏孝子

役于大國陟彼岵兮瞻望母兮狄仁傑
登山望雲曰吾親舍其下

念母嗟陟岵思親徒望雲可憐魏孝子不比狄參軍

韓伯瑜

母杖不痛哀母力弱對母悲泣梁彥先
使焦通觀其像通感悟盡孝

母力今衰矣悲啼得杖輕流風在繪像猶足感焦生

徐庶

辭先主曰老母見獲方寸亂矣王陵母曰為語陵毋以老妾故持二心

不勝方寸亂豈暇二心持忍矣王陵將賢哉徐庶辭

桓沖

小字買德郎母病須羊以解以身質羊後為江州刺史

不辭身作質只為母須羊此日江州牧當年買德郎

文中子

汾水之曲有先人之敝廬在有田可以具饘粥彈琴著書不願仕也

先人舊所理汾曲有田廬何意求聞達彈琴自著書

王悅

導之子有高名事親色養諸子莫及導見輒有喜色

色養傾餘子高名重一時足為丞相喜豈計外人知

木蘭

古樂府云阿爺無大兒木蘭無長兄願為市鞍馬從此替爺征

謹勿悲生女均之有至情縈能贖父罪蘭亦替命征
以上
孝詩

高 銘補

銘字聲玉號悅雲三山人宋官婺州教授

春日田園雜興

已學淵明早賦歸東風吹醒夢中非鶯聲睨睨來談
舊牛肯安閒勝策肥時聽樵歌時牧笛閒披道氈閒
農衣篇詩那可形容盡何似忘言對夕暉

月泉吟社第二十二名自署騎牛翁評云五
六作意就雜字上形容畧似爲氣格之累第
二句穎拔末用淵明意尤佳

翁汝正 補

汝正咸淳時崇安人

黃亭鋪

落日荒荒下遠燕市橋官柳綠扶疏沙頭一霎腥風

起沽酒老翁卻賣魚 崇安縣志

安 鑾 補

鑾咸淳時崇安人

舉富鋪

漠漠煙橫草樹青依稀風景似蘭亭小橋疏竹人沽

酒曲徑落花僧掩扇 崇安縣志

江梅補

梅咸淳時崇安人

新陽鋪

梅花籬落菜花畦春水平田釀燕泥健事老翁頭雪

白一簑煙雨自扶犁

崇安縣志

彭可軒補

可軒咸淳時崇安人

楊莊鋪

芳草迢迢去路垂楊脈脈長亭野渡半篙水碧斜陽

數點山青

崇安縣志

翁賜坡補

賜坡咸淳時崇安人

梅溪鋪

村北村南春水山前山後人家野渡何處飛雨流出

碧桃數花

崇安縣志

彭九成補

九成咸淳時崇安人

界牌鋪

地僻人家早掩關行人忙逐暮鴉還急風花落隔牆

樹暗雨鳥啼何處山

崇安縣志

李次淵補

次淵咸淳時崇安人

乾溪鋪

蘆芽抽盡柳花黃
水滿田頭未插秧
客裏不知春事晚
舉頭驚見棟花香

分水鋪

青山北去連吳會
綠水東流到八閩
何必此中分界限
普天率土盡王臣

崇安縣志

魏梅我補

梅我咸淳時崇安人

大安鋪

又望前村里深溪快渡槎牛羊半山塢雞犬幾人家

崇安縣志

范雲山補

雲山咸淳時崇安人

興田鋪

曲坡行盡處雞犬兩三家十里長亭路青山道正賒

崇安縣志

陳嘉言補

嘉言侯官人仕爲建州司戶咸淳末築室台

嶼人稱書隱先生

題太姥墓

太姥山在福甯州東堯時有種藍老姥家於路傍有道士求漿姥飲以膠

因授丹砂服之七月七日乘龍上升有虛墓存焉

吾聞堯時種藍嫗世代更移那可數帝堯朽骨無微
塵此閒猶有堯時墓墓中老嫗知不知五帝三王奚
以爲狼貪鼠竊攫尺土竅木未枯已易主君不見仙
人掌分明指取青天上騎龍謁帝大羅天不逐華蟲
挂塵網又不見石碁盤人去盤空局已殘當時勝負
此何有爭先劫奪摧心肝請君絕頂試披寫左望東
甌右東冶山川不見無諸搖但見烽煙徧郊野野老

吞聲掩淚哀茫茫滄海生蓬萊

名勝志

馬子嚴

補

子嚴字莊父號古洲建安人

烏林行

荊州兒曹不足恃何物老瞞欺一世兵書浪語十三
篇不料烏林出奇計隆準雲孫驅伏龍紫髯強援要
江東戈船植羽蔽寒日雪浪崩崖驚晚風行閒一卒
如兒戲持火絕江人不意灰銷漢賊終老心功入喬
家少年壻君不見華容道旁春草生魂銷不聽車馬
聲哀猿夜啼霜月冷空餘野燐沙邊明

詩人玉屑云此詩辭意精深不減張王樂府
惜世無知者錄遺後人共評之

黃鵬飛補

鵬飛字桂隱莆田人

送陳隨隱遊廬山

天下廬山第一奇西風楚楚送行時
晦菴白鹿書猶在
非是游山只愛詩

曾從圖畫識廬山
山好誰知畫亦難
畫好不如詩好
讀就煩詩筆
畫來看隨隱漫錄

張子厚補

子厚長樂縣人進士

九日亭

九日亭成氣象高
宰君乘興幾回過
山憐峻極凌霄漢
路愛幽深入薜蘿
長恐泛杯籬菊少
不愁落帽海風多
香醪正熟芳時節
對此年年奈醉何

長樂縣志

柯舉

舉字仲時號竹圃莆田人
德祐三年擢進士第
調朝陽尉未赴轉漳州教授
宋亡改名夢舉有夢語集

次韻答李景陽

客有扣舷者悠然太古音
風清來水面月白滿江心

世旣嘆途絕君何愛我深愧將瓦缶句聊以答南金
遊華嚴寺

舊遊曾記此山川萬事回頭一夢然蚤歲不知人易
老晚年方信世無禪樵歌牧唱千村暮鶯語花香二
月天人境了然描不就山僧對我更談玄

林昉

補

昉三山人

送西秦張仲實遊大滌洞天

此時仙興發九鎖訪名峯玉洞晝飛鼠石池春浴龍
異人花外見道士酒邊逢余欲采芳茗白雲何所從

洞霄詩集

廖

衡補

衡順昌人鄉舉不利隱居終身

句

淚多陳后愁離殿浴出楊妃困倚闌

延平府志云縣尉命詠雨中山茶云云時年六歲

林

衢補

衢長樂人

題廣州光孝寺

開池曾記虞翻苑列樹今存建德門無客不觀丞相

硯有人曾悟祖師幡舊煎訶子泉猶冽新種菩提葉

又繁無奈益州經卷好千絲絲縷未消痕

藏內法華蓮華諸經

係益州本故云名勝志

魏天應補

天應號梅野建安人疊山門人

送疊翁老師北行和韻

先生心事炳丹青顧影何曾媿獨行商嶺芝能如橘
隱首陽粟不似薇清綱常正要身扶植出處端爲世
重輕安得寒泉來會宿參同極論到天明

疊山集附

陳達翁補

言金口集卷二十八
達翁建安人

送疊山先生

流落崎嶇二十年幾回灑血杜鵑前一雙芒屨乾坤
窄萬古丹心日月懸案上靈龜元不食樊中孤鶴且
安眠逃名不得名終在行止非人亦有天

疊山
集附

黃蛾補

蛾羅源人年十五名播京師上召試之御前
有吟新月詩

新月

初出如弓未上弦分明掛在碧雲邊時人莫道蛾眉

小十五團圓照滿天

羅源縣志

陳公榮

補

公榮字子華長樂人景炎元年元兵入寇公
榮破產募兵與文天祥共圖興復授福清知
縣

挽族子老成

邊城將星落浩蕩煙塵黃我亦在行陣生死未可量
涕滂感永訣激烈摧肝腸昔爾仗雄劍志在清八荒
神武埒頗牧奇計如平良遇賊奮英果逐殺何其強
氣數乘人事竟向鋒刃僵忠魂薄日月耿耿萬古光

雖云獲死所國恥猶未忘便應作厲鬼虜酋罄殺傷

全閩詩話云公榮初遊太學景炎元年同子
宗傳族子老成募兵勤王蒲壽庚作亂泉州
幼帝舟自泉趨潮逾年張世傑會師討壽庚
公榮兵赴之老成戰沒詔贈御史臺簡法公
榮挽老成詩云

陳宗傳補

宗傳長樂人公榮子蒲壽庚以城降元宗傳

隨公榮討之戰死事聞贈提刑簡法

軍中行

景炎初募兵勤王作

胡馬出幽燕風塵起北陬天兵偶不利王氣黯然收
六龍守沙漠誰復爲報仇耿耿孤臣衷長懷麥秀憂

回首望京闕血淚相和流安得眾猛士盡如穰苴儔
戮力共廝殺梟取可汗頭掃清犬羊羣釐復舊神州
奇功勒燕石芳名播千秋

長樂縣志

蕭炎補

炎字寬夫號葛坡三山人

春歸二絕和高希遠韻

晴窗如暝樹雲遮紅紫成埃滅陌車不信春歸無綰
繫尙存一架木香花

厨供櫻筍上春盤把酒留春少住難祇是簷花前夜

雨明朝便作釀梅看

詩苑眾芳

張

建

補

建延平人

鳳凰巖

盡把鉏犁鑄五兵岐山無復鳳凰鳴何人更解驅頑

石飛向中原頌太平

東甌金石志

張清子

補

清子字希獻號中溪建安人宋末人著有易

本義通釋附錄集注十一卷

靈巖一線天

一畫起于乾先天至後天靈巖天一線想在伏羲前

武夷
山志

安
實補

實字子仁崇安人師事熊禾得理學宗旨三
試南宮不第乃絕意仕進聚徒講學於里中

中奢鋪

古樹斜陽噪暮鴉小橋流水有人家青帘白酒招行
客一路東風野菜花

崇安
縣志

句

竹林夜雨共清話草閣春晴理太玄
弱柳風含官

舍靜寒枝懸月女牆低

崇安
縣志

邱葵補

葵字吉甫同安人居海嶼中因自號釣磯治
春秋學親炙呂大圭洪天瑞之門宋末杜門
勵學著述甚富

贈魏秀才

屋茅蕭索泣寒蟲獨自吟詩學已工敗葉能令溝水
黑亂雲不放夕陽紅半生辛苦空儒服一歲蹉跎又
朔風不意窮鄉有奇事暮春得拜席門翁

再用前韵

月淡蓬門掩候蟲窮通底解問天工茶烹粟面紛紛

白燈吐花心灼灼紅屨改新吟添硯水密糊舊稿護
窗風相逢莫道龐公老覽鏡先慚似老翁

全閩詩話云有魏秀才者逸其名隱涪江之上葵贈詩云云其人頗有太上隱者之風不可使泯泯也

蔣粹翁

補

粹翁宋末太學生

滿月山龍見

千載聖人閩海出喜看龍馬亦騰驤首懸魚目星光
燦脊散虎文金線長道統再傳天有意素王重見世
應康惜哉靈物山中失漠漠煙林使我傷

全閩詩話云九蓮山其最高峯葱翠雄峙者
龍馬峯也宋末太學生蔣粹翁先世家此山
之下舍側有龍潭所養牝馬與龍孀生駒焉
龍首馬身狀如河圖父老語之曰此瑞物也
昔仲尼筆削六經而麒麟出今晦翁表章四
書而龍馬生蓋其應乎粹翁先世聞之養馬
殊謹後牧放林中竟失所在粹翁有詩云云
案此詩全閩詩話祇載首二句全詩見福建
通志

劉濟補

濟字應祿閩人有日行辨明德辨行世

題梅花莊

莊後莊前千萬枝元方題徧季方詩何當把酒對花
樹坐到參橫月落詩

全閩詩話云劉濟負詩名嘗題趙必漣梅花
莊云云

詹

琦補

琦字景韓崇安人隱身不出築靜可書堂於
武夷山南著有滄浪集一卷

遊山

弱齡秉末向撰念遊蓬瀛騰蓋玄圃臺投轡赤霞城
紫府五香馥丹邱四照縈班龍何天矯青鳳來相迎
道逢王子喬手曳芙蓉旌靈風襲霓裳邀我謁瑤京
天帝坐叢霄羣仙列兩楹羽節自飄揚眾樂鏘然鳴
授我金龜秘錫我王室名渴湫沆瀣漿饑餒橘樹英

忘形思入玄道在豈求羸流覺神驅盡逍遙雲翮輕
棗花千歲結桃核萬年成海水揚塵竭天衣拂石平
祈年本無分望仙徒自營寄謝樊籠士那知遺世情
崇安縣志

陳自新補

自新字貢父號敬齋甯德人精易學理數長
于詩宋末人著有起興等集

坐嘆

琴聲意似泉聲淡劍氣威如霜氣雄
世事關心憂不寐蕭蕭白髮月明中

瑞迹寺

雨過山溪生虎迹
雲歸巖洞長龍威
煙鐘古寺敲殘日
長笛一聲江鳥飛

瑞龍寺

寺外寒流玉一泓
白雲如練掛危層
青山遶屋柴門掩
只見梅花不見僧

以上甯德志

哀

謙補

謙字彥先崇安人高亢不仕耕隱縣東之黃洋結庵其上名曰玉泉

句

時人不識田園樂只羨相如駟馬車

玉泉崇安縣志

曾由基補

由基三山人

與中朝故人

自憐骨相太迤邐爲米折腰依舊貧古史多看多警
省新詩愈改愈精神與遊造物真知己怕說天朝多
故人蘭菊有時忙不得世間桃李幾番新

題御愛牡丹

天香不數魏姚家玉砌雕欄護絳紗聞說弓旌遍巖
穴憐才應是勝憐花

江湖後

高照補

照字雪崖邵武人舉進士任虔州司理參軍

金精山

金精寂寂真勝境門鎖松杉風月冷跨鶴仙姬去不

來白雲一片封丹井

宋詩拾遺

徐壽朋

補

壽朋長樂人進士

白雲亭

飛泉山腳水盈盈溪會亭前就榜名駐目合流尋異
派爽心臨眺勝登瀛遊人暗認仙源景清耳微傳玉

佩聲依約白蓮當日事社中賢令有淵明

長樂縣志

翁孟寅

補

孟寅字賓陽建安人善吟咏人多稱之

夜泊

夜泊寒沙際江風起舊愁離情惟怕晚歸夢又逢秋

建甯府志

陳

璣

補

璣字介行永春人

句

從此不除窗外草要觀天地發生心

讀易

須信生生是

真易疎籬依舊竹生孫

全閩詩話云陳穉學問該貫尤長於詩信筆
立成出人意表嘗有讀易詩云云

潘用中補

用中福建人

郊遊書所遇

誰教窄路恰相逢脈脈靈犀一點通最恨無情芳草
路匿蘭含蕙各西東

全閩詩話云潘用中隨父侯差於京邸潘喜
笛每父出必于邸樓凭欄吹之隔牆一樓相
距二丈許畫欄綺窗朱簾翠幕一女子聞笛
聲垂簾窺望久之或揭簾露半面潘問主人
知爲黃府女孫若是月餘潘與太學彭上舍
聯輿出郊值黃府十數轎春遊歸路窄過時

相挨其第五轎乃其女孫也轎窗皆半推四
目相視不遠尺餘潘神思飛揚若有所失作
詩云云暮歸吹角時月明見女捲簾凭欄潘
朗誦前詩數過適父歸遂寢黃府館賓晏仲
舉建甯人也潘明往訪邀歸邸樓雜飲橫笛
見女復垂簾潘因曰對望誰家樓也晏曰卽
吾館寓所窺主人女孫幼從吾父學聰明俊
爽且工詩詞潘愈動念晏去女復揭簾半露
潘醉狂取胡桃擲去女用帕子裏桃復擲來
帕子上有詩云欄干閒倚日偏長短笛無情
若斷腸安得身如輕燕子隨風容易到君旁
潘亦用帕子題詩裏桃復擲去云一曲臨風
值萬金奈何難買玉人心君如解得相如意
比似金徽恨更深女復以帕題詩擲不及樓
墜于簷下潘急下樓取之爲店婦所拾矣潘
以情告懇求得之帕上詩云自從聞笛苦
匆魂散魂飛似夢中最恨粉牆高幾許蓬萊
弱水隔千重遂令店婦往道殷勤女厚遣婦
囑勿泄且曰若諧酬更不薄後竟諧伉儷云

楊良臣補

良臣武夷人

碧沼寺

薄蹤飄梗寄禪扃偶到山間萬慮清方愧軒裳奔走
役忽聞猿鶴怨啼聲世情肯顧青衫老公道惟均白
髮生事業不須頻覽鏡幻身堪比羽毛輕新城志

林嘉仲補

嘉仲福清人

虎溪

山澗青連海溪長綠繞城規模唐故郡弦誦魯諸生

白日經簷短風霜吹客衣梅梢驚歲晚沙際看春歸

福甯府志

戴忱補

忱晉江人

蓮花峯

此石非頑石因成浩劫塵一蓮花不老過盡世間春

福建通志

趙永嘉補

寶蓋山詩刻

青山吐出白龍開我是地仙趙秀才嘉善有魚餐得

去永嘉有虎喚能來

福建通志云寶蓋山詩刻趙永嘉或曰宋時人或曰元時人虎岫僧有嘉善者與永嘉相好嘗網魚作食永嘉刻詩石上云云

閩詩錄丙集卷十七

閩閩

侯官陳衍補緝

長樂梁鴻志校訂

謝希孟

希孟字母儀晉江人景山之妹嫁陳安國早

卒

歐陽公序云希孟之詩尤隱約深厚守禮而不自放有古幽閑淑女之風非特婦人之能言也

詠芍藥

好是一時豔本無千歲期所以諱相贈載之在聲詩

句

爲花雖可期論德亦終鮮

牡丹

句牽主人衣一步行不

得

薔薇

薰薰麝臍烈灼灼猩血殷

躑躅

樹旣摧爲薪花亦

落爲塵

零凌

豔陽一何好零落千載冤

朱槿

盜者得其便

掉頭笑且歌

曼陀羅花

卞子眞賞口莊生夢還怯

蝴蝶花

歷代吟諧

黃淑

淑字致柔適建甯進士王防寡居後族議改

適因詠竹以見志

詠竹

勁直忠臣節孤高烈女心四時同一色霜雪不能侵

名媛
璣囊

連倩女

倩女延平人適鄰生陳彥臣

題竹簾

綠筠劈破條條直紅線經回眼眼奇爲愛如花成片

段致令直節有參差

名媛
璣囊

暨氏女

暨氏建安人

句

多情樵牧頻簪首無主蜂鶯任宿房

春渚紀聞云建安暨氏女子十歲能詩賦野
花云云觀者雖加驚賞而知其後不保貞素
竟更數夫流落而終
案七修類藁以爲元末人誤

閩詩錄丙集卷十八

道士

侯官陳衍補緝

閩縣會念聖校訂

黃希旦

希旦字姬仲邵武人九龍觀道士熙甯五年
五福宮成召至京師著有支離集

道峯山

屏列郡南隅子真常此憩雨欲澤人間雲霞先掩蔽
越王臺

荒臺枕古邱伊昔越王遊輦路今何在淒涼草樹秋

西菴寺

勝刹幽深枕縣西我來正值孟冬時雖無慧遠門堪叩幸有陶潛駕可隨世態堦前朝槿色歲寒雲外老松枝繫余本是林泉客到此甯慙漫賦詩

以上邵武府志

馮觀國

觀國號無町畦道人邵武人幼警悟習儒業旣冠遊方外刻意神仙術遇異人傳授得導引煉丹之法人呼馮顛好吟詩放蕩不羈後寓宜春紹興末端坐作偈而死

題化龍坊酒樓壁

若問先生歸去來此行直是到天台
碧桃瑤草紫芝熟到日須容醉玉杯

述懷

落魄塵寰觸處然深藏妙用散神仙
筆端間作龍蛇走壺裏常挑日月懸
謾說人倫來混世只將酒盞度流年
潛修行歸何處笑指瀛洲返洞天

以上江西詩徵

閩詩錄丙集卷十九

釋子

侯官鄭杰原輯

侯官陳衍補訂

省澄

省澄仙遊人乾德中賜號真覺禪師初駐泉州招慶寺後主龍華寺

示執坐禪者

大道分明絕點塵何須枯坐始相親杖藜日涉谿山趣便是煙霞物外人

法周

補

法周字元覺同安人王姓八歲出家住開元寺日授楞嚴千餘言凡三應詔咸稱旨賜章服號慧大師咸平中郡守宿翰至寺訪之行殿墀見其下數莖草指問云舊謂紫雲蓋地凡草不生因甚今卻有此周應聲云云翰深嘆服天聖元年跌坐而化

句

地因培客土凡草有時生

泉州府志

法輝

法輝泉州開元寺僧禪餘以詩自娛與呂縉

叔石聲叔陳原道結爲同社

題憲師壁

遠浸谿光碧寒生松檜陰漁舟驚暮雨高吹入秋林

泉州府志

惟

慎補

惟慎晉江人戒行潔清天聖中遊京師至則
徑歸曾魯公問曰闕下無禪侶如何住得君
惟慎應聲云云

句

敢言知己少性本類孤雲

泉州府志

有需

有需陳姓莆田人崇甯中居雪峯東庵創萬安院于何岩後住福州鼓山繼住雪峯有語錄行世與陳聘君易結草庵同隱石門

寄陳易

一作寄陳聘君體常

拂石跣趺樹影寬
定回霜月照人寒
此時况味誰知得
寫與秋藤居士看

案見仙遊縣志

蔡溪巖

案一作石門歌

吾結草庵蔡溪側
四顧峰巒皆削壁
石門千仞鎖天津
來者欲登那措足
住此庵中是何緣
不詩不頌亦

不禪飢來苦菜和根煮疊石爲床困卽眠日照諸峰
煙藹藹負暄孤坐情何適馴伏珍禽趁不飛猥猥捫
我衣中虱閑搗瘦筇六七尺山行野步扶危力披雲
入草不辭勞逢人打破修行窟或停松或坐石靜聽
溪泉激鳴玉源深洞邃來不休聲聲奏盡無生曲雜
羽流商誰辨的五音六律徒考擊有時乘興上高峰
大笑狂歌天地窄

案見補續
高僧傳

了樸補

了樸號慈航福州人天童寺僧涓熙五年孝
宗賜以太白山四字

上堂

酷暑如焚不易禁
炎炎赫赫欲流金
夜明簾外無人到
靈水超然轉綠陰

天童寺志

谷泉補

谷泉號大道禪師泉州人爲僧於南嶽芭蕉

庵

參慈明禪師還而作偈

相別而今又半年
不知誰共對談禪
一般秀色湘山

裏汝自匡徒我自眠

泉州府志

藏叟補

藏叟福建龍溪僧

送客宿九日山

石竈斷苔紋摩娑弔隱君
風吹游子袂月照古人墳
舊事殘碑在荒祠流水分
永懷山忽暝黃葉墜秋雲

南安
縣志

閩詩錄丙集卷二十

妓女

侯官陳衍補緝

長樂梁鴻志校訂

周氏

周氏古田妓

春晴

瞥然飛過誰家燕
驀地香來甚處花
深院日長無箇事
一瓶春水自煎茶

贈陳筑

夢和殘月過樓西
月過樓西夢已迷
喚起一聲腸斷

閩詩錄丙集卷二十一

處落花枝上鷓鴣啼

夷堅志云陳筑字夢和莆田人崇甯初登第
爲福州古田尉至官惑一倡周氏周能詩嘗
以詩贈筑首句蓋寓筑字也

閩詩錄丙集卷二十一

藩屬

侯官陳衍補輯

閩縣曾念聖校訂

陳日照

宋史云吳昌卒無子以女昭聖主國事遂爲其婿陳日照所有

案吳昌李氏安南國王

元史安南列傳云憲宗三年烏蘭哈達兵次交趾北先遣二人往諭之不返乃分道進兵遂入其國八年日照傳國於長子光曷光曷遂納款

案史作日暎而齊東野語安南傳皆作日照

句

池魚便作鵑鵬化燕雀安知鴻鵠心

閩詩錄丙集卷二十一

宋

一

齊東野語云安南國王陳日照本福州長樂
邑人姓名爲謝升卿少有大志不屑爲舉子
業間爲歌詩有云云類多不羈語

閩詩錄丙集卷二十二

叶仙神鬼夢怪

侯官陳衍補緝

侯官黃濬校訂

徐仙

徐仙南唐徐溫之二子知證知諤降神于閩
太宗皇帝遣使迎其神祀京師卽洪恩靈濟
宮也閩人錄其降筆詩文名徐仙翰藻

偶作

靜裏乾坤不計春非非是是任紛紛醒原醉白今何
在雲外青山山外雲

方武裘

武裘莆人劉潛夫之友胡天放降仙求賦自

稱大陽洞主

詠筆

貌出中山肯欲仙何人拔穎縛尖圓拙夫堪笑堆成
冢豪客曾聞掃似椽窗下玉蜍涵夜月几閒雪繭涵
春泉當時定遠成何事輕擲毛錐恐未然

志雅堂
雜鈔

福州社神

投蔡君謨

遠入青青疊疊峯峯前真宰讀書宮半巖冷落高宗

雨一枕淒涼吉甫風煙鎖豹眠閑霧露井凋鳳宿舊
梧桐九龍山下英雄氣盡屬君家世胄中

墨莊漫錄云蔡君謨作福守日有一書生投
詩來謁君謨異之尋令人伺其所歸至一山
下忽不見四顧無人唯一社屋爾意其社神
也

夢中宮女

拋毬曲

侍燕黃昏曉未休玉階夜色月如流朝來自覺承恩
最笑倩傍人認繡毬

隋家宮殿鎖清秋曾見嬋娟颺繡毬金鑰玉簫俱寂

寂一天明月照高樓

此首見
侯鯖錄

堪恨隋家幾帝王
舞裊揉盡繡鴛鴦
如今重到拋毬處
不是金爐舊日香

沈括夢溪筆談云福州士人李慎言字希古嘗夢至一處水殿中觀宮女戲毬山陽蔡繩爲之傳敘其事甚詳有拋毬曲十餘詞皆清麗今獨記兩闕

蔡京鶉怪

訴蔡京

食君廩中粟作君羹中肉
一羹數百命下箸猶未足
羹肉何足論生死猶轉轂
勸君宜勿食禍福相倚伏

庚溪詩話云蔡元長京既貴享用侈靡喜食鶉每預蓄養之烹殺過當一夕夢鶉數千訴于前其一前致詞云云觀此可爲饕餮而暴天物之戒

聞詩錄丙集卷二十三

雜語謠讖

侯官陳衍補緝

長樂梁鴻志校訂

蔡襄陳亞謔語

陳亞有心終是惡蔡襄無口便成衰

詩話總龜

章詒李士甯對話

腳踏西溪流去水手持東岳寄來書

東坡志林云章詒字隱之本閩人遷于成都數世矣善屬文不仕晚用太守王素薦賜號沖退處士一日夢有人寄書召之者云東岳道士也明日與李士甯游青城濯足水中詒謂士甯云云士甯答云云詒大驚未幾果死士甯蓬州人語默不常或以爲得道者

永福古讖

天保石移瑞雲來奇龍爪花紅狀元西東

游宦紀聞云永福古讖語云云乾道間福清天保瑞雲寺後石崖橫行齧地成蹊永邑東鄉石壁松上產龍爪花其年蕭公國梁果魁天下次舉黃公定臚唱第一蓋瑞花生處蕭西黃東各三十五里此狀元東西之應也

羅源民謠

十里清溪流活水連村綠稼有甘霖羅村野叟千秋

史秋浦先生一片心

羅源縣志云庚午夏羅源縣旱邑人鄭伯淵年七十餘與鄉人徒步至福源龍潭禱雨翌日果雨明年又旱亦如之邑有南北中三溪歲久壅塞伯淵捐金倡眾力疏之連城宰爲

記於學居民感其德歌之云云